

四庫全書

史部

欽定四庫全書

汴京遺蹟志卷十三

明 李漁 撰

雜志二

宋四京

京大也天子所居謂之京師宋四京者謂東京開封府

汴

西京河南府

洛

南京應天府

歸德

北京大名府

魏

宋史 真宗大中祥符六年以應天府為南京國

初因五代之舊以大梁為東京開封府洛陽為西

京河南府後以太祖舊藩歸德軍在宋州改宋州  
為應天府至是建為南京作鴻慶宮以奉太祖太  
宗御容仁宗慶歷二年五月以大名府為北京契  
丹聚兵幽薊聲言南下朝議請城洛陽呂夷簡曰  
此子囊城郢計也使契丹得渡河雖高城深池何  
可恃邪我聞契丹畏壯侮怯景德之役非乘輿濟  
河未易服也宜建都大名示將親征以伐其謀帝  
從之建大名為北京即真宗駐蹕之所城焉識者

黽之

葉少蘊石林燕語 唐都雍洛陽在關東故以為  
東都本朝都汴洛陽在西故以為西都皆謂之兩  
京祥符七年真宗謁太清宮于亳州還始建應天  
府為南京慶歷二年契丹會兵幽州遣使蕭英劉  
六符來求關南北地始建大名府為北京

又曰北京舊不兼河北路安撫使仁宗特以命賈  
文元故文元薦程文簡為代已只領大名一路後



文元再鎮固求兼領乃復命之且召昌朝罷則不置及熙寧初陳暘叔守北京遂以文元故事兼領

宋畿內十六縣

開封

赤

祥符

赤舊浚儀縣也大中祥符初改

尉氏

畿

陳留

畿

雍丘

畿

封丘

畿

中牟

畿

陽武

畿

延津

畿舊酸棗縣也政和七年改

長垣

隋匡城縣也建隆元年改為鶴丘後又改今名

東明

畿本東昏縣也乾德元年改

扶溝

畿

鄆陵

畿

考城

畿崇寧四年與太康縣同隸拱州大觀四年廢拱州而二縣復來隸云

太康

畿宣和二年復隸拱州六年仍隸京畿

咸平

舊通許鎮隸陳留咸平五年置縣

宋十衛

左金吾衛上將軍

右金吾衛上將軍

左金吾衛大將軍

右金吾衛大將軍

左衛上將軍

右衛上將軍

諸衛大將軍

諸衛將軍

率府軍

率府副軍

宋二十三路

太宗分天下為十五路  
仁宗又分為二十三路

京東東路

京東西路

京西南路

京西北路

河北東路

河北西路

陝西路

秦鳳路

河東路

淮南東路

淮南西路

兩浙路

江南東路

江南西路

荆湖南路

荆湖北路

成都路

梓州路

利州路

夔州路

福建路

廣南東路

廣南西路

宋史地理志

當是時東南際海西盡巴棘北

極三關東西六千四百八十五里南北萬一千六百二十里崇寧四年復置京畿路大觀元年別置黔南路三年并黔南入廣西以廣西黔南為名四年仍舊為廣南西路宣和四年置燕山府及雲中府路天下分路二十六京府四府三十州二百五十四監六十三縣一千二百三十四可謂極盛矣大抵宋有天下由建隆初迄治平末一百四年州郡沿革無大增損迨熙寧始務闢土而种諤王韶

章惇輩各為拓斥計矣

宋四殿

各置大學士以大臣為之

觀文殿

資政殿

端明殿

保和殿

宋六閣

皆累朝增建以藏宸翰之所

龍圖閣

藏太宗御筆

天章閣

藏真宗御筆

寶文閣

藏仁宗御筆

顯謨閣

藏神宗御筆

徽猷閣

藏哲宗御筆

敷文閣

藏徽宗御筆

宋史

真宗景德元年冬十月置龍圖閣奉太宗

御製文集及典籍圖書寶瑞之物與宗正所進屬

籍并置待制學士官自是每一帝崩則置一閣

葉少蘊石林燕語 祥符中始建龍圖閣以藏太

宗御集天禧初因建天章壽昌兩閣於後而以天  
章閣藏御集虛壽昌閣未用慶歷初改壽昌為寶  
文仁宗亦以藏御集二閣皆二帝時所自命也神  
宗顯謨閣哲宗徽猷閣皆後追建之惟太祖英宗  
無集不為閣

### 宋四園

瓊林苑

金明池

宜春苑

玉津園

葉少蘊石林燕語

瓊林苑金明池宜春苑玉津

園謂之四園瓊林苑乾德中置太平興國中復鑿金明池於苑北導金水河水注之以教神衛虎翼水軍習舟楫因為水嬉宜春苑本秦悼王園因以皇城宜春舊苑富國倉遂遷于此玉津園則五代之舊也今惟瓊林金明最盛歲以二月開命士庶縱觀謂之開池至上巳車駕臨幸畢即閉歲賜二

府從官燕及進士聞喜燕皆在其間金明水戰不復習而諸軍猶為鬼神戲謂之旱教玉津半以種麥每仲夏駕幸觀刈麥自仁宗後亦不復講矣惟契丹賜射為故事宜春俗但稱庶人園以秦王故也荒廢殆不復治祖宗不崇園池之觀前代未有也

宋五學

國子學

太學

武學

律學

算學



宋四館驛

都亭驛

待遼使之所

都亭西驛

待西蕃阿黎于闐新羅渤海使之所

懷遠驛

待交趾使之所

同文館

待青唐高麗使之所

宋六更

初更

二更

三更

四更

五更

六更

禁中更鼓每夜六更

和維愚見紀忘

前代夜俱五更惟宋朝則用六

更馮深居詩云春風吹送笑談香玉酒銀燈破夜  
涼歸去東華聽更漏杏花花落盡六更長又云三十  
六聲更點長汪水雲序宋亡事如云亂點傳籌殺  
六更風吹庭燎滅還明侍臣奏罷降元表臣妾簽  
名謝道清陳剛中詩云羽袍士尚傳三漏絳幘人  
誰報六更蓋內帳樓五更絕柝鼓便作謂之蝦蟇  
更禁門方開百官隨入所謂六更者也嘗疑五更  
古今通用何宋時獨用六更邪近考宋史自太祖

建隆庚申至理宗景定元年五庚申又十六年而  
宋亡蓋符太祖卜世于陳搏睡到五更醒時再來  
問之說庚更同音以此禁中常打六更而外方只  
謂之攢點也

大梁十蹟

夷門

古城

吹臺

隋堤

上源驛

愁臺

陳橋

艮岳

青城

官渡

汴城八景

鐵塔行雲 金池過雨 州橋明月 大河濤聲

繁臺春曉 汴水秋風 隋堤煙柳 相國霜鐘

又八景

艮岳春雲 夷山夕照 金梁曉月 資聖薰風

百岡冬雪 吹臺秋雨 宴臺瑞靄 牧苑新晴

靖康之變

按宋史政和後禁苑多為村居野店又聚珍禽野獸鹿  
鹿駕鵝禽鳥數百實其中至宣和間每秋風夜靜禽獸

之音四徹宛若深山大澤陂野之間識者以為不祥之兆宣和末南郊禮畢御郊宮端拱殿天未明百辟方稱賀間忽有鵲鳴于殿屋若與贊拜聲相應和聞者駭之時已報女真背盟未踰月內禪而明年有陷城之難政和三年夏至宰臣何執中奉祀北郊有黑氣長數丈出自齋宮行一里許入壇壝繞祭所皆近人穿燈燭而過俄又及於壇禮將畢不見人皆異之

政和七年詔脩神保觀俗所謂二郎神者汴人素畏之

自春及夏傾城男女負土以獻揭榜通衢云某人獻土  
又有飾形作鬼使巡門催納土者或以為不祥禁之後  
金幹里雅布圖京師其國謂之二郎君云

宣和初收復燕山以歸金民來居京師者其俗有臻蓬  
蓬歌每扣鼓和臻蓬蓬之音為節而舞人皆喜聞其音  
而效之其歌曰臻蓬蓬外頭花花裏頭空但看明年春  
二月滿城不見主人翁本金識故京師不禁然卒有靖  
康之變

宣和元年夏雨晝夜凡數日及霽開封縣前茶肆中有異物如大犬蹲踞臥榻下細視之身僅六七尺色蒼異其首類驢兩頰作魚頷而色正綠頂有角極長於其際始分兩岐聲如牛鳴與世所繪龍無異茶肆近軍器作坊兵卒來觀共殺食之已而京城大水訛言龍復讐云宣和五六年間上方織綾謂之遍地桃又名急地綾漆冠子作二桃樣謂之並桃天下效之香謂之佩香至金兵犯闕無貴賤皆逃避多為擄去亦此識也

宣和六年都城有賣青果男子孕而生子蓐母不能收  
易七人始免而逃又有豐樂樓酒保朱氏子之妻可四  
十餘楚州人忽生髭長六七寸踈秀而美宛然一男子  
詔度為女道士

宣和七年秋有狐由艮岳直入禁中據御榻而坐詔毀  
狐王廟

宋史筆斷論靖康災異 秦公子鍼曰國於天地  
有與立焉不數世淫弗能斃也此為諸侯而言也



董仲舒曰天人相與之際甚可畏也自非大亡道之世天盡欲扶持安全之此為帝王而言也蓋帝王為天之子為鬼神之主為萬民之父母非有桀紂之敗德煬帝之亂常於其政殆國危之際則天必降災異以警之警之者非所以絕之乃所以愛之也宋之徽宗初無涼德但於即位之始不能率由舊章奉若天命乃信讒說殄行之人用復熙寧紹聖故事廢黜忠鯁登用姦回戎狄之患既萌黨

人之獄復起故於建中靖國元年春正月朔有流星光燭地自西南入尾抵距星是夕有赤氣起東北  
方亘西南方中出白氣二將散復有黑氣在旁此則陰邪致亂之徵夷狄竊發之兆乃天所以先示厥警欲其脩德以弭之也惜乎徽宗荒怠弗敬謂天變不足畏謂國政不足脩謂任伯雨之言不足信乃以趙挺之為御史中丞以呂希純知瀛州解任伯雨陳祐言職范純禮出知潁昌府安燾陳

璫傳楫晁補之豐稷罷邢恕呂嘉問路昌衡安惇  
蹇序辰蔡卞並復宮觀與郡召張商英赴闕遼主  
洪基死孫延禧立女真阿固達亦立崇寧元年以  
蔡確配饗哲宗廟庭命內侍童貫如杭州監造御  
前生活仍詔司馬光呂公著等四十四人各奪官  
有差竄鄒浩于永州超拜蔡京為右僕射嗟乎政  
之錯亂一至於此而可以弭天變乎然而天之眷  
祐人君惓惓不已故於大觀四年有星孛于中宮

長數丈逆入紫宮退而復掃帝座者再此又天意  
明示金人之禍必欲徽宗保國而防患也奈何天  
譴雖切而忽之尤甚乃復大興土木窮索珍奇煥  
臺館之瓊瑤列綱運之花石舊盟遼主棄之自毀  
藩籬新結女真養之若招狼虎委童貫而為大將  
再敗王師封蔡京而為魯公重汙國典方且樂其  
臺池鳥獸豈思民欲與之俱亡天知其終不悔禍  
故不復告戒遂生亡國妖孽以詔之也自是火星

如月徐徐南行天裂有聲格格且久妖狐升於御榻黑青遍於京畿敗亡之徵其可過乎故雖有智將謀臣亦莫能善其後矣嗟乎徽宗之不畏天故至取敗向使其果能監此脩德以善隣尊賢以去佞咨諏治道一循常典則阿固達雖有假途之謀猖獗之勢亦安敢跨遼海而犯東萊越燕雲而侵中國乎由是觀之非天有負於徽宗而徽宗自負於天也書曰天難諶命靡常常厥德保厥位厥德

靡常九有以亡詎不信夫

宋史筆斷論汴京難守 汴京之地內無異產之  
材外無形勝之固其不可為國明矣然太祖都之  
而能以弱制強以小敵大遂若周公定鼎洛邑而  
成百六十餘年之基業者何哉蓋太祖以仁義而  
為金湯以禮樂而為干盾柔遠能邇推亡固存故  
能君主華夷而昌大其邦家也徽宗悉反其道色  
荒于政酒湏于德棄遼主而隳屏障結女真而致

干戈金人退兵思避其難故白時中請上南幸或  
勸上西幸洛陽嗟乎以宗廟之重而言國君當死  
社稷不可輕委而去以太王避狄人而言則當徙  
而去邠暫遠其害此則去守之兩途也然以往事  
而論之昔光武駐兵昆陽莽遣嚴尤等率大兵圍  
之光武夜與李軼等十三騎突圍而出收衆於外  
大破莽兵唐玄宗遇安祿山之亂力不能支決意  
幸蜀乃留太子募兵討賊嗟乎向使光武不出昆

陽同受圍困玄宗不幸西蜀坐守孤城則皆為圍中之物而為賊所擒矣又豈能討平寇盜而克復故物哉為欽宗者正宜監此分遣義士衛送上皇南幸已與李綱宗澤等大召援兵嬰城固守雖尼堪幹里雅布至未必有腹背受敵之患都城雖甚危弱亦未必旬月而陷也柰何吳敏李綱執於死社稷之論堅意苦留遂使徽宗父子輿觀蒙塵貽辱千載悠悠蒼天謂之何哉或曰避難出奔策固



善矣然不聞李綱有云萬一衛士中道散歸何以能達借使能達而尼堪諸人霆驅電邁雖隔天塹之險可投馬箠而渡事何能濟嗟乎此又無謀之言也蓋金人所長者騎射而已焉知艨艟闔艦之利以曹操用兵如神猶尚困於赤壁况尼堪之小醜乎觀其於建炎之間尼堪不敢渡江乃遣烏珠南侵則其技術亦可知矣于時李綱適已竄去使其猶在城陷之日不知綱為從行歟將死於敵歟

愚故曰李綱雖知報國之忠而不知用兵之畧也  
邵氏聞見後錄 宣和殿聚殷周鼎鍾尊爵等數  
千百種國破金人盡取之其下不禁勞苦半投之  
南壁池中後世三代彝器當出于大梁之墟云

和維愚見紀忘 徽欽北狩可謂世之大變而詩  
人感情見于題詠者皆言其奢縱之過如云萬炬  
銀花錦繡圍景龍門外軟紅飛淒涼但有雲頭月  
曾照當時步輦歸此言當時元宵遊賞之樂不卹

國政而後人徒見淒涼之月色也如云蒼龍觀闕  
東風外黃道星辰北斗邊月照九衢天似水何人  
吹笛內門前此言故宮雖在已為金人據守也如  
云濯龍江上綠成堆半是宣和舊日栽聞說白頭  
宮女伴倚欄猶待翠華來此詠柳枝以比中原遺  
民愛戴不忘望其克復而來也元好問云雙鳳簫  
聲隔綵霞宮鶯催賞玉谿花誰憐利澤門前柳瘦  
倚東風望翠華此言太平之時奏樂賞花于龍德

宮之玉谿靖康之變君臣妃后囚繫漠北惟有都門之柳日望其歸而不可得利澤門汴之水西門也劉後村云初為御筆行中旨漸取兵權付左瑞玉帶解來頒貴倖珠袍脫下賜降羌又云兵來尚恐妨恭謝事去徒知悔爽攻丞相自言芝產第太師頗奏鷗翔空如何直到宣和季始憶元城與了翁蓋言徽欽之失非止奢侈淫佚之極亦由罷黜賢臣任用閹宦崇尚祥瑞賞賚無功以致禍變也

元城劉公了翁陳公皆以諫官得罪去

何喬新論韓里雅布圍京師 韓里雅布之伐宋懸師

深入兵家所忌然卒以取宋何也宋之主相非才  
而不能用善謀也夫完顏氏兵甲之盛雖未易當  
然張孝純堅守太原金以大衆攻之歷三時而後  
拔况京師城郭之固師旅之彊糧餉之豐非太原  
比使宋有中材之主得救時之相聞金兵南下亟  
命良將勁卒固守黎陽彼必不敢渡河就令得渡

然金兵僅六萬勤王之兵至城下者已二十萬宜  
命大軍扼牟駝岡以當其前奇兵屯邢相以截其  
後青齊之兵攻其左襄鄧之兵擊其右雖使韓彭  
為將賁育為卒良平為謀主懼將潰敗不可支况  
幹里雅布輩邪當是時非無善謀也种師道請俟  
彼情歸扼而殲諸河李綱請俟其食盡力疲縱其  
北歸半渡而擊之皆策之善者也欽宗舉不之從  
惟李邦彥割地請和之謀是聽蓋欽宗陰柔之君

邦彥陰柔之輔金固有所悔而動也易曰公弋取彼在穴欽宗之於邦彥是已嗟夫自古以來違善謀而用邪說以取亂亡者多矣豈獨欽宗也哉

王廉論李綱請固守京師之非 宋徽欽時金人入寇李綱力主固守京師以衛社稷夫死社稷諸侯守土之職非天子之事也李綱不此之悟而欲留二帝固守京師以待勤王之師與金背城一戰以決勝負若綱者賢則賢矣不幾於知常而不知

變者乎昔者太王嘗避狄人之逼孟子又嘗以對  
滕君矣夫太王滕君皆侯國也及其行權聖賢猶  
許之況於萬乘之尊乎故唐玄宗幸蜀以避祿山  
之禍代宗幸陝以避吐蕃之難德宗幸奉天以避  
朱泚之亂卒賴勤王之師再造唐祚使當是時三  
宗皆如李綱之議則安祿山吐蕃朱泚之慘三宗  
能不震驚乎綱力主其議二帝從之幸而幹里雅布  
尋以師退京師賴以無虞及綱罷是後朝臣不建



行幸之議至冬金復入寇何鼎又執綱議欽宗以足頓地誓死社稷朝臣乃不復言遂至二帝北巡貽宗廟之羞遺人民之禍實皆綱鼎知常而不知變之罪也當時之計莫若從太王避狄之謀襲三宗出幸之事命康王為元帥李綱為相權之不撓用之不疑詔徵天下勤王之師以衛王室斯善之善者也即有不虞亦無北遷之禍顧乃為守土臣之計以致二帝身亡國削哀哉

丘濬世史正綱論二帝北狩 嗚呼宋人以忠厚  
立國而其敗也受禍乃慘于晉人何哉是非獨天  
數盖亦人謀之不臧也所謂人謀之不臧柰何曰  
方金兵之未渡河也拒禦之計莫急於防扼河津  
可用汪立信沿江之策及金勢不可遏也自全之  
計莫切於權行避敵可用唐玄宗幸蜀之策若夫  
車駕既行京城防守之計又莫要於堅壁清野可  
用周亞夫斃吳之策何也自古立國必據險阻宋

都汴梁平原之地而與彊鄰為敵所以限之者一  
河耳謀國者不知據險以守境危急之際乃以要  
害之地付之庸腐闇人金之渡河如履平地既渡  
笑曰南朝可謂無人若以二三千人守此吾豈得  
渡邪當時誠有能建策如汪立信沿江之守盡出  
內地之兵以實外禦四五十里而為一屯屯有守  
將十屯而為府府有總督其尤要害處則參倍其  
數而命一大將領勁兵數萬往來巡督況河面比

江面為不遠用兵不多雖金兵併聚而來然亦可  
以少延月日而吾之勤王兵日集矣若夫真宗澶  
淵之役王欽若勸幸江南陳堯叟勸幸蜀當全盛  
之時為遷幸之說誠為失策靖康之際則非景德  
比矣蓋效有唐乎唐玄宗避安祿山之寇而幸蜀  
肅宗起於靈武遂復唐祚其德宗幸奉天僖宗幸  
興元皆用此策也况女真又非唐三寇比其意在  
於金幣而不在土地其技長於野戰而不能攻城

觀其得汴京既以與張邦昌邦昌不能立又以與  
劉豫其意蓋可見矣使當時謀國者當金兵尚遠  
之時先請上皇率六宮以幸江南逼近之際繼擁  
欽宗領禁兵以巡襄鄧二帝在外號召四方之兵  
以為救援京師之舉京城之守則付之大臣如李  
綱者使之內堅城壁外清草野屯重兵而不動閉  
重門以自居彼欲縱兵以遠追慮吾扼其歸路彼  
欲肆暴以劫掠則又野無所得其勢自然不能久

居而有畏散之心矣然後遣使與之通好或增歲幣或邀重盟縱有屈抑不至受禍如此之慘矣說者徒以人君死社稷為言且謂天下城池豈復有如都城者嗚呼此老生之常談爾盍量其君曰彼能死社稷否乎都城雖堅孰能守之乎吾之言彼能始終聽之不移乎苟不能然孰若委任一人如漢人之用周亞夫者以守都城雖以九重宣命三軍夜驚略不少動如是則號令出于一人持守定

而事功易集以俟機便使凡彼之所以令其下剋期以取效者皆過期而不應其徒衆自然解體後有所言皆不之信而主謀者亦且持議不固矣其心不能以不離其勢不能以不散計不出此乃苦留車駕又併其已出者而返之遂使九族六宮盡遭荼毒嗚呼誰之咎歟迨夫高宗之中興也父母兄弟盡在他人手中為所刼質一舉手動足輒有妨礙遂致不能復不共戴天之讎以貽千萬古之

笑恨嗚呼天乎人乎

劉定之史論 徽宗失道致寇事已迫矣而付諸  
子當是之時非雄才不能有為也况欽宗之孱庸  
乎父子塊然剪為囚擄父之罹此也宜而子亦可  
謂不幸已前乎宋者父致寇而付諸子有若唐之  
玄肅然父尚能西奔至蜀不為人所魚肉子尚能  
北奔至靈武內挾俶傖二雛為心膂外任郭李諸  
傑為爪牙以返旆于舊都而徽欽不能焉非獨才



愧于玄肅而宋都汴亦不若唐都關洛山河險固  
可憑仗以緩其傾危可前卻以圖其興復耳夫汴  
非可都之地宋因五代之舊而都之山河險固不  
足恃而恃兵以為命然邊敵之兵強中國之兵弱  
其俗不同也創業之兵彊守成之兵弱其時不同  
也今以邊敵為隣國以守成期子孫則兵不可恃  
而宜資于山川之險固明矣宋之都汴豈非失計  
邪

王鏊震澤長語 宋世人才誠非我朝可及然其  
謀國之疎則不及我朝遠甚靖康之變尼瑪哈以  
孤軍深入為宋謀者當堅壁清野勿與戰絕其歸  
路斷其糧道內用李綱外用种師道俟天下勤王  
之師四集彼自救之不暇何乃遽自張皇不敢發  
一矢二帝自幸其營為人席卷而去誠可恨也誠  
可笑也

汴京遺蹟志卷十三

# 欽定四庫全書

史部

汴京遺蹟志卷十

十四至十六

詳校官左都御史<sub>臣</sub>李綬

編修<sub>臣</sub>程嘉謨覆勘

覆校官主事<sub>臣</sub>龔敬身

校對官原任中書<sub>臣</sub>徐步雲

校對官中書<sub>臣</sub>李 榮

謄錄監生<sub>臣</sub>官懋弼

謄錄監生<sub>臣</sub>俞成鯨

欽定四庫全書

汴京遺蹟志卷十四

明 李濂 撰

藝文一

奏議

上仁宗論修固京城

宋范仲淹

臣危言孤立久荷聖知當此旰食之憂豈可循默自守  
雖以言而取罪亦以盡臣子之心臣先於景祐三年五  
月初在開封府曾進劄子言西洛帝王之宅絕無儲備

乞聖慈以將有朝陵為名使東道有餘則運而西上西道有餘則運而東下數年之間庶幾有備太平則居東京舟車輻輳之地以便天下急難則守西洛山河之宅以保中原當時臣言西洛可營者以備急難也今北事既動營洛已晚臣今別有愚見請一一陳之竊聞修建北京以禦大敵以臣料之可張虛聲未可為倚何哉河朔地平去邊千里敵馬豪健晝夜兼馳不十數日可及澶淵陛下乘輿一動千乘萬騎非數日可辦倉卒之間

敵馬已近欲進北京其可及乎此未可一也又承平已久人不知戰聞寇大至羣情憂恐陛下引憂恐之師進涉危地或有驚潰在爪牙之臣誰能制之此未可二也又北京四面盡平絕無險阨儻乘輿安然到彼而敵馬旁過直趨河南於澶淵四面乘凍而渡京師無備將何以支宗廟社稷宮禁府庫皇宗戚里之屬千官百辟之家六軍萬民血屬盡在無金城湯池可恃無堅甲利兵可禦陛下行在河朔心存京師豈無回顧之大憂乎此

未可三也假使大河未凍寇不得渡而直圍守澶淵聲  
言向闕以割地會盟為請當此之時京師無備邊塵俯  
逼陛下能堅守不動而拒請乎唐明皇時祿山為亂舊  
將哥舒翰以四十萬兵屯守潼關請不出戰且以困賊  
楊國忠促令進討一戰大敗遂陷長安今京師無備寇  
或南牧朝廷必促河朔諸將出兵截戰萬一不勝則有  
天寶之患朝廷將安往乎昔煬帝盤遊淮甸遠遼關中  
唐祖據之隋室遂傾明皇出幸西蜀非肅宗立于朔方



天下不復為唐矣德宗欲幸益郡李晟累奏乞且幸山  
南以繫人心乃知朝廷萬邦根本今陝西河北聚天下  
之重兵如京師搖動遠衆兵則姦雄奮飛禍患四起  
臣聞天有九閼帝居九重是以王公法天設險以安萬  
國易曰天險不可升地險山川丘陵王公設險以守其  
國正在今日矣臣請陛下速修東京高城深池軍民百  
萬足以為九重之備乘輿不出則聖人坐鎮四海而無  
煩動之勞鑾輿或出則大臣居守九重而無回顧之憂

矣彼或謀曰邊城堅牢不可卒攻京師坦平而可深犯  
我若修固京師使不可犯則伐彼之謀而沮南牧之志  
矣寇入之淺則邊壘已堅寇入之深則都城已固彼請  
割地我可弗許也彼請決戰我可弗出也進不能為患  
退不能忘歸然後因而撓之返則追之縱有鈔掠可邀  
可奪彼衰我振未必不大勝豈非陛下保社稷安四海  
之全策哉或曰京師王者之居高城深池恐失其體臣  
聞後唐末契丹以四十萬衆送石高祖入朝而京城無

備閔宗遂亡石晉時叛臣張彥澤引契丹犯闕而京城  
無備少主乃陷此皆無備而亡何言其失體哉臣但憂  
國家之患而不暇顧其失體也若以修築城隍為失體  
不猶愈於播遷之禍哉朝廷大臣百官必曉此事但懼  
議者謂其失體而不敢言臣任在西陲非當請間而言  
此事誠罪人也然臣子之心豈敢忘君親之憂况臣素  
愚拙惟知報國不知避謗昔奉春君負販之夫勸高祖  
都關中而張良贊之翌日命駕臣叨預近列而輒建言

比之奉春君之僭未甚為過至於西洛帝王之宅太祖  
營修有意在子孫表裏山河接應東京之事勢連屬關  
陝之形勝又河陽據大川之險當河東之會要為西洛  
之北門又長安自古興王之都天下勝地皆願朝廷留  
意常委才謀重臣天下幸甚

慶歷二年八月上時為陝西四路安撫沿邊招討使

上仁宗乞罷修京城

余靖

臣竊聞大臣建議內有修京城置府兵二事者伏以廟  
堂謀議天下具瞻帝王言動萬世為法安危所繫舉措

非輕事之幾微不可不謹難與慮始人之常情臣願陛下深思遠圖以安民為本臣請縷陳二事伏望陛下擇其可否臣聞西賊僭號之初宋庠請修函谷此時關中動搖謂朝廷棄關西而自守今無故而修京城乃是捨天下之大而為嬰城自守之計四方聞之豈不動搖強弱之勢正在此矣無戎而城春秋所譏守在四夷義不如此又前歲以邊鄙之警而河北諸路揀點鄉兵其利未集而先致其害况今北敵之賂既厚西戎之好既講

雖知信誓不可卒保。罄罄蒼生咸望帖泰而都畿之下  
先自擾之根本不寧。四方何望哉。昔魏侯恃險吳起以  
為失詞。宣王料民山甫談其害政。惟是二者皆古今之  
所重而安危之所起。乞陛下捨此二策。別議遠圖之術。

慶歷四年五月  
上時知諫院

上哲宗乞罷修京城

范祖禹

臣伏聞開修汴京城濠。日役三四千人。雖和雇夫力調  
發不及民。其錢不屬戶部。然財出於民一也。豈可不計。

校愛惜而枉費用之臣聞開濠深一丈五尺闊二百五  
十一步廣於汴河三倍自古未聞有此城池也新城周  
世宗所築太祖因之建都于此百二十年無山川之險  
可恃所恃者在修德在用人在得民心此三者累聖所  
以遺後嗣子孫也神宗時宋用臣提舉修京城大興土  
功版築過當小人之情惟欲廣用民力多費國財上則  
徼幸爵賞次則隱盜官物故役無有不大大費無有不廣  
此姦臣之所利非先帝意也陛下始政散遣修城役夫

百姓皆歡呼鼓舞今欲終成前功但全之而已可也何必廣作無益以害有益乎又京城外門正門即為方城偏門即為甕城其外門皆用純鐵裹之此祖宗時所無也甕城乃邊城之制非所以施於京師今東西南三面偏門亦欲為甕城臣不知大臣何見而為此謀必以為威北敵也使北敵果渝盟南向大臣將坐守此以受敵乎春秋時囊瓦為令尹城郢沈尹戌曰子常必亡郢苟不能衛城無益也古者天子守在四夷天子卑守在諸



侯諸侯卑守在四鄰四鄰卑守在四境固其四境結其  
四援民狎其野三務成功民無內憂而入無外懼國焉  
用城今民是懼而城於郢守已小矣卑之不獲能無亡  
乎昔梁伯溝其公宮而民潰民棄其上不亡何待今大  
臣不修德政而急於城池此囊瓦城郢之計也唐神龍  
中張仁愿為朔方總管築三受降城不置甕門或曰邊  
城無守備可乎仁愿曰兵貴攻取賤退守寇至當併力  
出拒敢回望城者斬何事守備退忸其心哉後常元楷

代為總管始築甕門議者益重仁愿而輕元楷今於京城為受矢石之備是不如張仁愿之守邊城也自修城浚池以來議者皆以為無戎而城無寇而溝公宮此言不可不畏其北門甕城已就改之重勞臣欲乞降指揮東西南三面偏門止為方城其濠廣闊可減三分之二稍正王城之體以惜民力以省國用

元祐四年五月上  
時為右諫議大夫

按范文正公之奏深切事情為當時社稷之慮甚周可謂有特見者余范二公之論亦是一說然以

靖康之禍觀之則文正之言若筮龜矣

上真宗乞罷營玉清昭應宮

王曾

臣伏聞朝廷設諫諍之官防政治之闕非其官而言者  
蓋表其忠况當不諱之朝復忝非常之遇苟進思之無  
補懼竊祿以貽譏臣伏覩國家誕受殊祥薦膺秘籙祚  
洪圖於萬葉超盛烈於百王陛下寅畏寶符陟封名岳  
功垂不朽澤浸無垠奉若之心斯為至矣而清衷濬發  
成命亟行就嚴城之北隅啓列真之秘宇式昭丕應特

建嘉名自經始以來庀徒斯廣輦他山之石相屬於道途伐豫章之材遠周於林麓累土陶甃揮鍤運斤功極彌年費將鉅萬掩祈年之舊制踰柴日之前聞輟貴近以董臨假使權而領護如此則國家尊奉靈文之意不為不厚矣崇飾臺觀之規不為不壯矣然而臣之愚懇或異於斯既有見聞安敢緘默臣以為今之興作有不便之事五焉雖鳩僦已行未可悉罷苟或萬一采芻蕘之說省其功用抑其制度亦及民之大惠而憂國之遠

圖也所謂五者之目請為陛下陳之且今來所創立宮  
規制宏大凡用材木莫非榱桷竊聞天下出產之處收  
市至多般運赴宮尤傷人力雖云只役軍匠寧免煩擾  
平民况復軍人亦是黎庶此未便之事一也邇者方畢  
封崇頗煩經費今茲興造尤耗資財雖府庫之中貨寶  
山積畚築之下工徒予來然內帑費積代之蓄藏百物  
盡生民之膏血散之孔易歛之惟難雖極豐盈尤宜重  
惜此未便之事二也夫聖人貴於謀始智者察於未形

禍起隱微危生安逸今雙闕之下萬衆畢臻暑氣方隆  
作勞斯甚所役諸雜兵士多是不逞小人其或鼠竄郊  
鄆狗偷都市有一於此足貽聖憂此未便之事三也王  
者撫御寰區順承天地舉動必遵於時令裁成不失於  
物宜靡崇奢侈之風罔悖陰陽之序臣謹按月令孟夏  
無發大衆無起土功無伐大木今肇基卜築衝冒鬱蒸  
倣擾厚坤乖違前訓矧復旱暵卒虐雷電迅風拔木飄  
瓦溫沴之氣比屋罹災得非以失承天地之明效歟此

未便之事四也臣竊聆中間符命之文有清淨育民之戒今所修宮閣蓋本靈篇而乃過興剖掘之功廣務雕鏤之巧雖屢殫於物力恐未協於天心此未便之事五也伏望遵祖宗之大猷察聖賢之深戒遷思回慮懲往念來詔將作之官息勤苦之衆輯寧羣品對越高穹如此則遐邇宅心人祇快望必若光昭大瑞須建靈宮將相畢勞聿爰成績則臣敢效愚計亦可必行但能損彼規模減其用度止崇樸素無取瑰奇惟將之以誠明仍

重之以嚴潔名數之際加等是宜實費之資節儉為要  
俾四海之內知陛下愛重民力之意豈不美歟昔太宗  
皇帝建太一上清等宮亦不使窮極壯麗臣請陛下宜  
遵而行之取為法制示不敢踰即鳴謙大德光於千古  
矣奈何特欲過先帝之制作乎并覩西京造太祖影殿  
東岳置會真之宮計其工庸亦皆不啻中人百家之產  
然於尊祖禮神則盛矣其於邦國大計猶未足為當時  
之急務也臣料陛下必為海內承平邊隅清晏人康俗



阜時和年豐縱或築宮無損於事臣復謂其不然方今疆場甫定敵廷有姑息之虞民俗苟安倉箱無紅腐之積况關輔之地流亡素多近甸之氓農桑失望雖令有司安慰亦恐未復田廬秋冬之間饑歉是懼亟經營於神館慮稍鬱於輿情且往古廢興之端前王得失之事布在方冊足為商鑒者陛下覽之詳矣試觀自昔人君崇尚土木孰若清靜無為者之安全乎願陛下留神垂聽無忽臣言則天下幸甚今雖上下之人皆知事理如

此而人人自愛莫敢輕黷冕旒至於左右大臣則慮計之不從致見踈之悔中外百執則慮言之難達招妄動之尤使忠謹之謀未盡良為此也惟臣出自幽隱遭遇文明特受聖知度越流輩官為侍從身服簪裳粗識安危之機未申補報之效捐軀思奮今也其時又安敢循默苟容不為陛下別白而論之乎是以輒率庸妄輕冒宸嚴感發於中無所顧避陛下寬其鼎鑊之罪矜其螻蟻之誠深監古先試垂採擇無謂增建靈宮為一細事

而弗恤臣以為興役動衆尤繫事機不可不察也當使鄉校之中豪奸之黨無所開竊議之口則微臣之望也天下之幸也

大中祥符二年六月  
上時為知制誥

### 上仁宗論玉清宮災

蘇舜欽

臣聞烈士不避鈇鉞而進諫明君不諱過失而納忠是以懷策者必吐上前蓄冤者無至腹誹則上下之情不鬱教令之出悅隨然言之之難不如容之之難容之之難不如行之之難有能言之則必容之容之則必行之

如此則欲治之主三代之迹也願陛下留意焉臣伏觀  
今歲自春徂夏霖雨陰晦未嘗少止農田被菑者幾於  
十九民情惻惻如昏墊焉臣謂近位之失人政令之多  
僻賞罰弗公之所速也天之降災欲悟陛下陛下反謂  
刑獄濫寃之致故肆赦天下以救之殊不念如此則殺  
人者不死傷人者不抵罪其為濫寃則又加甚古者決  
留獄斷滯訟以平水旱不聞用赦也故赦下之後陰靈  
及今前志曰積寃生陰積陰生陽陽生則火災見焉非

戾之氣發洩於玉清宮震雨雜下烈焰四起樓觀萬疊  
數刺而盡誠非慢於禦備乃上天示戒也陛下當降服  
減膳避正寢責躬罪已下哀痛之詔罷非業之作拯失  
職之民在輔弼無裨國體者去之居左右竊弄威權者  
去之精心念政刑之失虛懷收芻蕘之言庶幾變災以  
答天意辰浹之間不聞有此告諭竊知陛下將計功役  
再謀興修都下之人聞者駭惑往往聚首橫議咸謂非  
宜皆曰章聖皇帝勤儉十餘年天下富庶帑府流行無

所貯藏乃作斯宮及其畢功而海內為之虛竭陛下即位未及十年數歲連遭水潦雖征賦咸入而百姓困乏若大興土木之功則費用不知紀極財賦耗于內征役勞于下內耗下勞何以濟矣況天災而已違之是欲競天無省已之意逆天不祥安已難任欲祈厚貺其可得乎豈天譴告而陛下弗悟邪豈知而故為之邪豈再造以祈天之祐邪臣不得不反覆而量也今為陛下計者莫若來吉士去佞人姑務修德以勤至治使百姓足給

而寬其征稅則可以謝天意而民情安矣賢君見變能  
修道以除凶亂君無象天不譴告今幸得天見之變是  
陛下修道之日豈宜忽哉昔漢宣帝三年茂陵白鶴館  
災下詔曰乃者火災降於孝武園館朕戰栗恐懼不燭  
變異罪在朕躬羣有司又不肯極言朕過以至於斯將  
何悟焉夫茂陵不及上都也鶴館不及此宮也彼尚降  
詔四方以求已過是知古帝王急治如此夫火不炎上  
之罰正為是耳臣謹按前漢五行志云賢佞分別官人

有叙率由舊章禮重功勲如此則火得其性矣若信道不篤或耀虛偽讒夫昌邪勝正則火失其性矣自上而降濫焰妄起燔宗廟燒宮室雖興師而不能救故魯成公三年新宮災劉向謂成公信三家子孫之讒逐父臣之應也襄公九年春宋災劉向謂宋公聽讒逐其大夫華弱奔魯之應也今宮災豈得亦有是乎願陛下恭默而內省之省而既知之願陛下悔過而追革之罷再造之勞役行古先之典法非惟大光基業亦天下之幸甚



也臣愚妄之言不足益國體之萬一陛下苟容而行之  
三代兩漢之風指顧可致也

宋龔明之中吳紀聞 蘇舜欽字子美易簡參政  
之孫慷慨有大志工為古文聲名與歐陽公相埒  
天聖七年玉清昭應宮灾子美以太廟齋郎詣登  
聞上䟽謂天以此垂戒願陛下恭默自省語甚切  
直時年方二十登景祐元年進士第俄有詔戒越  
職言事者子美又上書極論其不可時論韙之

按宋史天聖七年六月丁未大雷雨玉清昭應宮災翌日太后對輔臣泣曰先帝力成此宮一火延燔殆盡猶幸一二小殿存爾樞密副使范雍度太后有再葺意乃抗言曰不若燔之盡也太后詰其故雍對曰先朝以此竭天下之力遽為灰燼非出人意如因其所存又復修葺則民不堪命非所以祇天戒也宰相王曾呂夷簡亦助雍言推洪範災異以諫太后默然時舜欽年

甚少為太廟齋郎上此奏偉乎壯哉

上仁宗論京師土木勞費

歐陽脩

臣近者為京師土木興作處多乞行減罷尋准勅差臣  
與三司公同相度減定續具奏聞次今又聞聖旨下三  
司重修慶基殿及奉先寺屋宇臣伏見近年政令乖錯  
綱紀隳頽上下因循未能整緝惟務崇修祠廟廣興土  
木百役興作無一日暫息方今民力困貧國用窘急小  
人不識大計不思愛君但欲廣耗國財務為已利恣侵

欺於官物圖酬獎之功勞託名祖宗張大事體况諸處神御殿當蓋造之初務極崇奉棟宇堅固莫不精嚴雖數百年未必損動近年以來不住修換昨開先殿只因一柱損遂換一十三柱前後差官檢計朝廷並不取信只憑最後之言遂至廣張物料蓋緣廣張物料即多酬獎恩澤竊以崇奉祖宗禮貴清淨今乃頻有遷徙輕瀆威靈要其所歸止為小人圖利臣見自古人君好興土木者自春秋史記歷代以來並皆書為過失以示萬世

今小人圖一旦之利黷祖宗之威靈致人主於有過之地誰忍為之臣實痛惜臣因准勅減定於三司畧見大槩開先殿初因兩條柱損今所用材植物料共一萬七千五百有零睦親宅神御殿所用物料又八十四萬七千又有醴泉福勝等處物料不可悉數此外軍營庫務合行修造者又有百餘處使厚地不生他物惟產木材亦不能供此廣費自古王者尊祖宗事神示各有典禮不必廣興土木然後為能臣切見累年火災自玉清昭

應洞真上清鴻慶壽寧祥源會靈七宮開寶興國兩寺  
塔殿並皆焚燒蕩盡足見天意厭土木之華侈為陛下  
惜國力民財謹戒丁寧前後非一陛下與其廣興土木  
以事神不若畏懼天戒而脩省其已興作者既不可及  
則未脩者宜速寢停况睦親神御殿於禮不宜作其事  
甚明別無典禮講求乞更不下太常便行寢罷其慶基  
殿如的有損漏只令三司差官整補不得理為勞績其  
奉先寺乞令寺家自修今垂拱殿是陛下常坐之殿近

聞為無梁木且止未脩諸皇親自火燒居宅後至今寄寓他所蓋將良材美木俯徇小人並於不急處枉費遂致合行脩造處却至乏材伏望陛下追思累次大火常發於土木最盛處凡國家極力興脩者火必盡焚且天厭土木而焚之又欲興崇土木以奉之以此福應未臻而災譴屢降也伏乞上思天戒下察人言人言雖狂而實忠天戒甚明而不遠伏惟陛下聖德恭儉不樂遊畋凡所興修皆非嗜好但以難違小人一時之請自取青

史萬世之譏實為陛下惜之伏望聖慈廣賜裁擇

至和二年

上時為翰林學士

上仁宗請勿脩上清宮

包拯

臣伏見十一月初二日夜上清宮火謹按春秋傳例曰人火曰火天火曰災漢書五行志曰人火天火同為災異皆以朝廷政令參驗得失而勸戒焉說者曰賢佞分別官人有序則火得其性若信道不篤或耀虛偽則火失其性自上而降濫焰妄起是為火不炎上上清宮者



乃祖宗脩建以崇無為之德今火燔之者豈焚修之人  
不務精潔以副陛下嚴奉之旨乎不然其天意垂戒於  
陛下乎固宜勵精治道謹脩人事以答天變可也風聞  
道路云陛下存留道衆似有繕修之意未辨虛實咸懷  
危懼况天下多事調發旁午帑藏未實邊鄙未寧豈可  
先不急之務舉無名之役哉且宮觀興於唐室非古制  
也若謂先聖真容理當欽奉則景靈宮會靈觀殿宇宏  
壯可以奉安陛下推仁慈之德念疲敝之民且務安之

安之之方豈忍重困之也然外議紛紜頗甚惑衆欲乞特降詔諭以安衆心

上仁宗乞罷寶相禪院新建殿宇

韓琦

臣竊聞右街寶相禪院見在移拆法堂初蓋大悲殿宇特命中官監領其事所役兵匠數千百人假以舟車資其輦運凡百用度悉從官給規模之盛功作甚崇臣計其興建之因恐非陛下之意也臣伏覩近者興國寺雙閣災延及大殿長廊俱為煨燼其寺舊安祖殿俯逼都

市衆人之慮再有脩葺而陛下亟降旨命悉令停寢任其緣化使自營造斯所以重天戒而愛民力也稽諸載籍事實難行戴履之倫孰不欣幸何乃遽傷治體有損邦用起無名之役為不急之務乎所謂恐非陛下之意斯可明矣又向者陛下崇務本之仁念維城之重即昭應之遺址建睦親之大第諸邸之聚三千餘間常度不充侵用南郊材植又且萬計復令出產州郡供補其闕物役之大從可知矣今者業已成功焯為熙事何則厚

宗枝而隆孝治豈無益之所為乎當時言事者猶比上封章願寢斯議盖亦重改作而節浮費也臣謂此役既終即凡土木不急之事一切宜停以緩財力夫崇采椽三等之制者唐堯之仁化也惜露臺百金之產者漢文之儉德也煥在方牘所宜規範伏望陛下俯從愚說遠紹前徽悟色相之非求本慈仁之足尚躋民壽域永底太平斯乃奉順祖宗愛養元元之本也其實相院初盖殿宇等臣欲乞詔下有司令悉停罷俾其營求施利得

自修崇蓋此殿若成則法堂未立加之廊宇制度悉求  
相稱必於間隙漸次申陳事既垂成理須從許如此則  
功費之廣倍於初矣利其成而規賞典者其徒亦繁矣  
且罷興國而營寶相則是休彼役而勞此功廢置雖殊  
耗蠹豈異臣又慮遠陛下重天戒愛民力之本意故昧  
死陳述冀裨萬一

景祐三年七月  
上時為左司諫

上仁宗乞罷迎開寶寺塔舍利 余靖

臣伏見開寶寺塔為天火所燒五行之占本是災變朝

廷所宜戒懼以答天意尋聞遣人於塔基掘到舊瘞舍利內庭看畢送還本寺許令士庶燒香瞻禮者道路傳言舍利在內庭之時頗有光恠臣恐巧佞之人因此推為靈異惑亂視聽先自內庭外及四方抄歛錢物再圖營造臣忝備諫職見此事體不可不言臣聞帝王行事但能勤儉脩德感動人心則雖有急難後必安濟臣觀今天下自西陲用兵以來國帑虛竭民間十室九空陛下若勤勞罪已憂人之憂則四方之民咸蒙其福矣如

其不恤民病廣事浮費奉佛求福非所望於當今且佛者方外之教理天下者所不取也割黎民之不足奉庸僧之有餘且以侈麗崇飾甚非帝王之事或有戒臣者曰若有營造必不出於府庫但取內庭無用之物準其直而與之亦不誅求於民任自僧徒化其願施之者積歲累月而成之庸何傷哉臣應之曰天下之民皆厭賦役之煩不聊其生至有父子夫婦攜手赴井而死者其窮至矣陛下若恤民之病取後宮無用之物內帑有餘

之幣出助邊費勿收中民一年田租明降指揮布告中外此則陛下結天下之心感召和氣雖造百塔無以及之若作無用浮侈之事民益怨矣又二年以來減省後宮請給皆言內中煎迫不似往前今一旦捨施則財物無紀何以取信四方哉切緣市井之人有知者少既見內庭崇奉則遽相扇動傾箱竭橐為害滋深若以經火不壞便為神異則本在土底火所不及若言舍利能出光恠必有神靈所憑此妄言也且一塔不能自衛為火



所壞又何福可庇於民哉今朽木腐草皆有光水精及珠之圓者夜亦有光況舍利本西方恠異之物有光亦非今日之瑞昔梁武帝造長塔舍利亦常有光及臺城之敗何能致福視此可以監之矣其開寶寺舍利塔伏乞指揮更不營造上以見陛下不惑之明下以昭國家愛民之意仍乞更不迎入內中供養且僧人軍校皆呼舍利入宮不祥之語尤宜謹之其燃頂爛臂之人亦乞

禁絕

慶歷四年六月  
上時為右正言

上仁宗乞罷脩開寶寺塔

蔡襄

臣數日聞迎舍利歸開寶寺臣始疑之以為必無此事  
屢以愚言乞賜寢罷不蒙聽納今又聞民間傳言皆謂  
陛下欲重脩開寶寺塔伏念陛下必以邊事為憂蒼生  
為意豈有枉費施於無用然慮僧徒妄引靈恠以惑聖  
聰臣請悉推意而盡言之或以舍利有光引為靈驗臣  
謂浮屠舍利之所居不能護惜天火所焚一夕而盡豈  
可謂之神靈枯朽之物灰燼之餘或有光恠亦妖僧之

所爲也或以此塔太宗皇帝所造理須修復臣謂昭應宮上清宮皆先朝所置天火一空已不復修孰有非議若以禁中共出資財不費於官不擾於民臣謂一塔之費百萬緡一錢之資皆生民膏血當此多事匱乏之時豈可虛費若施於土木果有福利以之助軍須而寬民力此豈獨無福利哉況天火所焚大為警戒陛下當修人事以報之今大興工役是以人力而拒天意也伏惟陛下聖哲聰明必無此意人言不已臣實憂疑所有開

寶寺塔如有乞脩復者伏望陛下特加深罪以絕欺妄

慶歷四年六月  
上時知諫院

上仁宗乞罷修寶相寺

何郯

臣伏聞朝廷近有指揮以寶相寺昨遭焚蕩許令寺僧緣化修葺蓋朝廷重糜府庫之財又不欲遂廢其寺故有此處分以臣愚心思之其間尚有利害不可不論訪聞寺僧主事者素豪猾善結託今既開端許其緣化彼將假朝廷之命以脅誘民庶多求財貨則京師騷然侵

蠹蓋其意不惟以修寺為事將圖財用為奉身恣縱之  
資或民力不足則將因緣權倖復求朝廷出府庫之財  
以畢其事此必然之理也假使民力可辦於國家雖無  
所費亦不可許方今公私財力大屈凡起一事興一役  
未嘗不取於民外方之民已困數歛惟京師之民幸而  
未加橫賦緩急有事亦將不免固不可使之輕費家貲  
以奉土木不急之務朝廷頃年脩寺舍佛閣已費累巨  
萬一旦遂為煨燼况外議傳云寺僧常以婦人置於佛

閣昨火發之際焚死者數人若傳者果信是朝廷廣費財以崇奉佛事適足為羣僧淫戲之所近日主首坐遺火罪止於奪師名紫衣寬假已甚不可更啓其姦弊重耗民財也臣按春秋或書災或書火其名雖殊然於變異之兆其實同歸定哀之間兩觀桓僖宮災漢儒皆謂天燔其所不當立今寺舍之災豈非以彫靡之過不當立而立天命燔之亦如兩觀等災以示勸戒乎若有重議脩之非所以畏上天之譴告伏望陛下追觀前事之

監深究異祥之來無興功以答天戒其寺舍佛閣欲乞一切罷脩用示聖懷抑畏之美臣以朴愚誤蒙擢進苟有聞見不敢不陳惟聖明不以狂妄廢其言則死生幸

甚

皇祐元年上時  
為殿中侍御史

乞罷修壽星觀

司馬光

臣等前者伏覩陛下幸壽星觀奉安真宗御容當是時臣等不知事之本末未敢進言自後方知本觀舊日止有先帝時所畫壽星近因本觀管幹內臣吳知章妄有

奏陳稱是先帝御容意欲張大事體廣有興脩自為勞效別圖恩賞陛下天性仁孝以為崇奉祖宗重遠其請遂更畫先帝御容以易壽星之像改為崇先觀知章既得御容倚以為名姦詐之心不知紀極乃更求開展觀地別建更衣殿及諸屋宇將近百間制度宏侈計其所費踰數千萬向去增益未有窮期臣等竊以祖宗神靈之所憑依在於太廟木主而已自古帝王之孝者莫若虞舜商之高宗周之文武未聞宗廟之外更廣為象設



然後得盡至誠也惟高宗祭祀親廟微為豐數故傳說  
曰黷于祭祀時謂弗欽禮煩則亂事神則難祖已曰祀  
無豐于昵盖規之也後至漢氏始為原廟當時醇儒達  
禮者靡不譏之况畫御容於道宮佛寺而又為壽星之  
服其為黷也甚矣且又太祖太宗御容在京師者止於  
興國寺啓聖院而已真宗御容已有數處今又益以崇  
先觀是亦豐于昵也無乃失尊尊之義乎原其所來止  
因知章妄希恩澤乃敢恣為誣罔興造事端致陷朝廷

於非禮今既奉安御容難以變更若只就本觀舊來已  
脩屋宇固足崇奉所有創添屋宇伏乞一切停寢止令  
有司以時侍奉所有知章誣罔聖聰依託御容妄有干  
請廣興力役乞下所司取勘窮治姦狀明正其罪取進

止

嘉祐七年十  
二月三日上

乞罷脩感慈塔

司馬光

臣伏聞感慈塔已有聖旨圻脩五層竊以開封府界京  
東京西河北河東陝西西川等路自去冬少雪今春少

雨麥田已無所收昨得五月十三日雨方種秋田自後  
又經一月無雨萌芽始生隨復焦槁農民嗷嗷大率無  
食棄去鄉里流離道路雇妻賣子以接餬糧縣官倉廩  
素無蓄積贍給軍衆猶恐不足固無贏餘可以賑貸陞  
下當此之際所宜側身刻意降服損膳以救其患而更  
脩此佛塔以費國財臣竊以為失緩急先後之務矣且  
此塔傾欹為日已久借使更經數年不脩於僧徒有何  
大害若百姓饑窮朝不及夕而國家不能收恤則老弱

轉死溝壑壯者散為盜賊當是之時雖有千塔將安用之夫府庫之財皆生民膏血苟非事不得已安可輕費今有司既諂諛苟且曾不為陛下愛惜陛下又不以介意一皆聽之使四海蒼生將何所依仰臣愚欲望陛下親發德音宣諭有司以今歲旱災且罷脩此塔及其餘不急之費有似此類者皆令有司條奏以聞一切寢罷候他年豐稔帑藏有餘然後徐議其事於聖政之初亦足以彰愛民之意為盛美之一事也取進止

治平元年  
五月十五

上日

乞停寢京城不急脩造

司馬光

臣伏見近日以來脩造稍多只大內中自及九百餘間以至皇城諸門并四邊行廊及南薰門之類皆非朝夕之所急無不重修者役人極衆費財不少此蓋陛下纘極之初禁庭之中誠有破漏不可居者陛下畧命整葺理亦宜然而左右之臣便謂陛下好興土木之工遂廣有經度雖不至損壞之處亦毀拆重修務以壯麗互相

誇勝外以希旨求知內以營私規利萬一陛下更因此  
賞之則營造之端猝無窮已國財必竭民力必殫臣竊  
惟陛下新臨天下惠澤未孚於民而以好治宮室流聞  
四方非所以光益聖德也脩造勞費不可勝數臣請且  
言諸州買木一事擾民甚多衙前皆厚有產業之人每  
遇押竹木綱散失陪填無有不破家者先帝躬履節儉  
宮室苑囿無有增飾故諸場木材皆有羨餘屢因赦恩  
放免買木以寬民力自頃脩造倍多諸場材木漸就耗

減有司於外州科買百端營致尚恐不足而工匠用之  
賤如糞土昔漢文帝惜十家之產罷露臺而不作今諸  
場前後所積竹木何啻十家之產陛下至仁若察其所  
從來得不為之愛惜乎况即今在京倉庫踈漏甚多皆  
以上件數處興工占使匠人物料未暇脩葺致粟帛之  
類大有損敗古者將營宮室宗廟為先厩庫為次宮室  
為後今之所脩緩急先後無乃未得其宜乎又皇子生  
而富貴年未及冠所宜示以樸素端其所習今聞所脩

三位規摹侈大又復過於祖宗之時皇子所居漢明帝  
曰我子何得比先帝子此恐非所以納之於義方也臣  
愚伏望陛下特降聖旨一應大內裏外舍屋即目不至  
大段損壞之處及不至要切如南薰門之類並罷興脩  
其皇子位只因舊屋夾截脩整早令畢工不得過為宏  
壯且令那減匠人物料修倉庫之損壞者所司諸處監  
脩之官自是本職更不與減年磨勘及轉官酬賞以塞  
泰侈之源使天下皆知陛下去奢從儉仁民愛物不亦



美乎取進止

治平二年五月十一日上

乞罷脩太乙宮

文彥博

臣伏見脩建太乙宮為民祈福臣聞太乙天神之貴者天道貴質凡所營繕理宜簡質不務雕鏤之巧不事金碧之華不重費不太勞不日成之神明安之虔潔之誠內充天人之心交感神應之福其理必然臣又見累年以來禁中營造不已般運木石鳩集丁匠殆無虛日既有專切提舉脩內司復置都大提舉內中脩造司誠恐

所司各以宏麗取悅上心一作未畢一作復興新舊相  
形不極不已國財民力豈易支供臣伏見陛下督責水  
官以利農畝必思夏禹卑宮室盡力乎溝洫勵精庶政  
勤恤民隱必思漢文罷露臺思百家之產臣伏願陛下  
亟勅中外不急營造一切權罷即國用無窮民力稍寬  
臣又見繼聖堂祖宗燕射之地今為造弩椿所運斧斤  
置鑪鍛喧煩褻瀆理恐非宜詩云維桑與梓必恭敬止  
况祖宗之舊蹟乎乞將製造弩椿移置他所或歸之有

司則重明麗正之廷加之嚴潔奉先孝思之心益以光  
顯臣職在樞筦主調兵匠義當獻納區區下誠伏望采

察

熙寧四年上

上徽宗止建火星觀以禳赤氣 任伯雨

臣聞天人之交不啻影響災祥之來必有象類故格主  
先正厥事而聖人惟能畏天嘗聞脩德以弭災未有因  
祈禳而消變者也六經所載百世可知臣風聞近日內  
臣打量太乙宮側欲建火星觀以禳赤氣之異臣始聞

之中心不信亦既累日傳者益衆臣為諫官當救其源  
聞雖未詳敢不先事犬馬之心誠不能已竊惟陛下即  
位以來災異屢降蓋天之於人君猶父之於其子愛之  
深則教之至數有災異或者欲陛下戒懼以謹厥初歟  
陛下固宜小心脩德克己正事謹按洪範以五事配五  
福說者謂視之不明是謂不哲時則有赤祥陛下當益  
廣聰明判別賢佞攬權綱以信賞罰專威福以察功罪  
使皇明赫赫事至必斷則乖異之象轉為休祥昔太戊

有桑楮之妖高宗有鼎雉之異皆能寅畏克正厥事成  
中興之功延過歷之年未聞勞人費財留心土木也若  
使脩德之效不及祈禳則聖人六經何獨不載又或祈  
禳有感脩德不應則無私之上天顧可以私禱乎陛下  
必若建此臣竊計其費不下萬金將取之有司邪則帑  
藏空虛取之內庭邪則括刷已迫河北一路物貴人饑  
前年至今流移滿道與其捐所急以事無用孰若緩所  
用以恤所急如此則所費有名所惠成德人人鼓舞天

下相慶皆謂陛下損已便民道光前古人心悅而天意得矣赤氣之異豈不轉而為祥哉臣伏願陛下遠稽格王仰測天意畏之以心謹之於事不泥世俗之論罷去祈禳之役則人情自孚上穹昭答矣

建中靖國元年正月

汴京遺蹟志卷十四

欽定四庫全書

汴京遺蹟志卷十五

明 李濂 撰

藝文二

記

汴州東西水門記

并序

唐韓愈

貞元十四年正月戊子隴西公命作東西水門越三月  
辛巳朔水門成三日癸未大合樂設水嬉會監軍軍司  
馬賓佐僚屬將校熊羆之士肅四方之賓客以落之士

女蘇會關郭溢郭既卒事其從事昌黎韓愈請紀成績  
其詞曰

維汴州河水自中注厥初距河為城其不合者誕寔聯  
鎖于河宵浮晝湛舟不潛通然其襟抱虧䟽風氣宣洩  
邑居弗寧訛言屢騰歷載已來孰究孰思皇帝御天下  
十有八載此邦之人遭逢疾威囂童噉嚙劫衆阻兵慄  
慄栗栗若墜若覆時維隴西公受命作藩爰自洛京單  
車來臨遂拯其危遂去其疵弗肅弗厲薰為大和神應



祥福五穀穰熟既庶而豐人力有餘監軍是咨司馬是  
謀乃作水門為邦之郭以固風氣以閉寇偷黃流渾渾  
飛閣渠渠因而飾之匪為觀遊天子之武維隴西公是  
布天子之文維隴西公是宣河之汙汙源于崑崙天子  
萬祀公多受祉乃伐山石刻之日月尚俾來者知作之  
所始

汧水新渠記

宋陳師道

汧句于蕭其闕如瓌水經謂河至滎陽良蕩渠出焉渠

至陽武其下為沙蔡水是也其出為陰溝溝至浚儀其下為渦別為汭汭至蒙別為獲餘波迤于淮陽東歷蕭彭城入于泗注謂鴻溝官渡溜獲丹浚與渠一也禹塞滎澤而通渠于甫田其後河旃然入焉即索水也漢書地理志滎陽既有汴水又有葭蕩而受沛蒙有獲水首受溜獲至彭城入泗以余考之河渠書云自禹之後滎陽引河為鴻溝以通宋鄭陳蔡曹衛與濟汝淮泗會于楚而竹書紀年梁惠成王入河于甫田又引而東明非

禹之舊也書曰濟入于河東出于陶丘北者入而復出也溢為滎者濟之別也滎波既豬障而東之也周官又謂豫之川滎洛幽兗之川河沛則河南無濟矣其謂良蕩受濟禹塞滎澤而用河者皆失之漢志良蕩無出溜獲無始蓋畧之也余謂與經合而滎水諸書皆不載又疑渠汭為二而滎有一焉杜佑以經作于順帝之後詭誕無據而注叙渠源或河或沛或河沛合其說不一次其所引經紛錯悖戾而志亦闕畧不具辨始末蓋皆不

可考也自漢末河入于汭灌注兗豫永平中導汭自滎陽別而東北至千乘入于海而河復於是故瀆在新渠之南注所謂絕河而受索自此始隋開皇中因漢之舊導河入汭大業初合河索為通濟渠別而東南入于淮而故道竭今始東都受退水為臭河於畿為白溝於宋為長沙於單為石梁於徐為汭而入於南清南清故泗也蓋自三都而東畿宋亳宿單濟之間千里四來而故道淺狹春夏不勝舟秋水大至亦不能受也蕭故附庸

之國城小不足居民又列肆於河外每水至南里之民  
皆徙避之廬舍沒焉率數歲一逢民以為病紹聖三年  
縣令朝奉郎張惇始自河西因故作新支為大渠合于  
東河以導滯而援溺於是富者出財壯者出力日勸旬  
勞既月而成邑人相與語曰渠議舊矣更數令不決而  
卒成於吾侯孰有惠而不報者乎於是不謀而同欲紀  
於石以屬余余謂張侯其居善守行峻而言直以成其  
名其任善義不畏不侮以登于治然其可紀者多矣而

諸父兄獨有見於此者何也夫善為治者人知其善而已至其所善蓋莫得而言也渠之興作有迹其效在今此邑人之所欲書也遂為之書

新脩東府記

陳繹

中書政事本也宰相三公官也官不必備惟其人匪其人不居且體貌大臣禮重而莊物采顯庸宜備而稱豈曰私其人哉蓋所與坐而論道不下席而致太平之功者二三執政而已國朝以來尚襲唐故大臣多不及建

里第而僦居民間至距城數里之外東西南北回遠不相接也四方奏書緩急報聞吏卒持走徧歷諸第一有漏露稽違失亡其可逮乎而又暑寒雨風晨趨暮還與衛駟呵導從前後搢紳士大夫造請紛馳于里巷坊曲之隘甚非尊嚴體貌之觀也今禁衛三帥率有公廨庶官省寺亦或有居而獨大臣不列府舍每朝則待漏闕門之次入則議政殿上退即廳事羣有司公見請白可否少休吏史抱文書環几案左右頡頏以進至日下晝

數刻始歸夫以王城輦轂之大其制度之闕如此乃出  
聖畫新創二府親遣中人度地于闕之西南輪廣方制  
旁皇鈎折繪圖以聞即判定于禁中申命三司飭吏諸  
司計工程材役不妨時費不病官自熙寧三年秋七月  
興作東西府凡八位總千二百楹明年秋八月東府四  
位成詔知制誥臣繹為之記臣拜手稽首以書十月工  
實之次謹按三代盛王繇禮義之政至于周而大備文  
章典刑物采位叙煒然見于朝廷之表公卿内外居有



室宅上不為過侈下不為苟納出則寵之淑旂龍章鉤  
膺之駕入則具之列鼎蒲進粉純之居仰而視其宮則  
有棖題之襲密俯而攝其衣則有袞舄之嚴麗且謂不  
如是不足以待其人非其人不足以相天下之政故其  
取予屈舒厚薄等衰一謂之天秩先王之澤既竭能道  
古人之言者起以其私學蔽尚迷謬世俗雖有志之主  
厭然而所慕者不過耳目之所習响响而望其下者益  
卑西漢去治世未遠開丞相府四出門無闌不設鈴不

警言鼓深大宏遠無有限節郡國守長吏得以歲上計事  
國有大議車駕亦親幸而臨聽焉然其議不過軍功武  
爵期會督責之故至于東漢仍建公府蒼龍闕東偏其  
制度雖存而稱號不復於當時蓋用人授位出于一切  
其煩文虛器隆殺存亡者亦無足以繫政事之重輕宋  
興之初平定四方烜耀神武遂一字內頗用戰勲閭閻  
將帥之人浸久而安生民樂嬉百年之間軌蹟運行將  
臣相臣夜寐夙興罔敢有懈皇帝臨位躬攬權綱顯白

訓義圖惟先王治理之實置府設屬大放古制文武弛  
張名器有等大小尊卑靡不遵序夫名者禮之分也位  
者處其名之器也名既正然後任責之理得而百事脩  
明名不正則任責之理廢而百事隳必使望其器可以  
知其職可以知其人書曰股肱喜哉元首起哉百工熙  
哉是繇天子任大臣以道而率作興事罔不喜樂賡歌  
卒起乎治功之隆蓋君臣會遇千載之甚盛德也若乃  
聖作物覲宣耀典訓垂萬世之丕則考不磨之斯文其

不在二府之制而在道德之意乎

新脩西府記

陳繹

唐初典兵禁中出於帷幄之議故以機密名官開元中設堂後五房而機密自為一司其職秘獨宰相得知舍人官屬無得預也貞元之後藩鎮旅拒重以兵屬人乃中官分領左右神策軍而樞密之職歸於北司然嘗寄治省寺庶下廷英會議則屏立殿西勢猶厭厭傳道宮省語而已至其盛時其貴者號中尉次則樞密使皆得

貼黃除吏唐末既除北司并南北軍于樞密使遂總天下之兵五代以來多以武人領使而宰相知院事國朝復置副貳簽書直學士之名大畧文武參用間以宰相兼領之故得進退大吏預聞機政其任職蓋重矣古之公卿入則相與謀於朝出則相與謀於家家宰膳夫之政不至于耳目而天下四方之事每得於燕處之際故其為之不勞而日常若有餘今未明而入進見請決於陛席之前退而百執事叩閣稟事吏持書奏周走閭巷

終日不得與二三大臣謀求若古人之春容有餘勢固不行也熙寧三年詔營兩府于掖城之南其任樞密使者為西府於是有司知上之所以優隆大臣將以脩天下之政于堂陛之下莫不率職底功士獻其能工致其才不周歲而告成臣謹按樞密司馬之職事而周制屬於夏官秦漢曰太尉亦冠將軍之號祿比丞相置官屬掌兵武夫善用兵者使之至於無兵善治兵者治之至於無事然後天子之威刑震耀偃然懽折於萬里之外

噫非二三大臣曷以哉若夫仰而登則恩見於櫟枏俯而宴則禮見於階陛周旋指顧無非上之致隆於已者是則其所以享寵而居是者可無思乎

待漏院記

王禹偁

天道不言而品物亨歲功成者何謂也四時之吏五行之佐宣其氣矣聖人不言而百姓親萬邦寧者何謂也三公論道六卿分職張其教矣是知君逸於上臣勞於下法乎天也古之善相天下者自咎夔至房魏可數也

是不獨有其德亦皆務於勤爾况夙興夜寐以事一人卿大夫猶然况宰相乎朝廷自國初因舊制設宰臣待漏院於丹鳳門之右示勤政也至若北闕向曙東方未明相君啟行煌煌火城相君至止噦噦鑾聲金門未闕玉漏猶滴撤蓋下車于焉以息待漏之際相君其有思乎其或兆民未安思所泰之四夷未附思所來之兵革未息何以弭之田疇多蕪何以闢之賢人在野我將進之佞臣立朝我將斥之六氣不和災青荐至願避位以



襏之五刑未措欺詐日生請脩德以釐之憂心忉忉待旦而入九門既啟四聰甚邇相君言焉時君納焉皇風於是乎清夷蒼生以之而富庶若然則總百官食萬錢非幸也宜也其或私讎未復思所逐之舊恩未報思所榮之子女玉帛何以致之車馬器玩何以取之姦人附勢我將陟之直士抗言我將黜之三時告災上有憂色構巧詞以悅之羣吏弄法君聞怨言進諂容以媚之私心惛惛假寢而坐九門既開重瞳屢回相君言焉時君

惑焉政柄于是乎隳哉帝位以之而危矣若然則死下獄投遠方非不幸也亦宜也是知一國之政萬人之命懸于宰相可不慎歟復有無毀無譽旅進旅退竊位而苟祿備貧而全身者亦無所取焉棘寺小吏王禹偁為文請誌院壁用規于執政者

河南省左右贊治堂記

元許有壬

世皇一區宇河南地大民夥闢宣慰司於汴至元壬辰改行中書省國制中書總庶政是為都省幅員際天機

務日繁相天下重地立行省而分治焉若稽古制魏晉  
有行臺齊隋所管置外州稱行臺尚書省唐以諸道事  
繁准齊分置今行省其遺制也官有平章政事左右丞  
參知政事丞相則設置不常佐幕有左右司都省分為  
二行省則合為一設郎中員外郎都事各二員一省贊  
畫賴焉左右司名昉乎隋唐改郎中為左右承務趙宋  
尤重董正六曹彌綸省闥紀綱百司舉正文書之稽失  
非昔知臺閣故事不在茲選我朝簡擇尤甚内外不殊

由是而至執政者班班可紀河南佐幕往者不可悉考  
今則刑部郎中觀音努員外郎托音陝西省郎中趙中  
為郎中宣文閣鑒書博士兼經筵譯文官和琳都汴梁  
路治中拜特穆爾南臺監察御史范勿為員外郎上都  
留守司都事圖們哈雅檢校官羅吉董守成為都事朝  
議以用兵供億而溢其負也其堂舊無扁都事田腹入  
為禮部郎中請於承旨歐陽公扁曰贊治吉走書相下  
請記不果作及來承乏鞅掌倥傯亦不暇作一日謁詔

使汴梁府署密邇省治有間道可不往適過所謂贊治堂者憇焉古輩請曰記久未得茲躬履其地其有時乎乃為之說曰字書訓贊曰佐曰助平時之治且資佐助在今日宜何如簿領鈎稽其常職也非贊也贊亦有說乎上官之曲而其直之下情之隱而其豁之刑獄之濫而其平之財粟之出而其節之逃亡未復復不遂農疆域多戍戍不知兵移病流弊萃於省垣治之不力逸邇顛危而扶而持竭誠殫智治效有不著乎且稱人之美

亦曰贊世盖有好諛而樂受欺者苟贊其美不救其惡  
治何望焉抑昔人有言上策莫如自治斯言雖為它設  
敢斷章為諸君獻惟自治而後有以贊吾之治斯不負  
堂扁矣

汴梁泮宮脩復石經記

李師聖

宇宙之為宇宙造化之為造化皆一實理主之理之所  
寓則斯文而已矣文之所布則六經而已矣凡天之所  
以命聖人聖人之所以代天言者方策具焉迨吾夫子

出從而刪之正之贊之脩之集羣聖之大成而萬世之標準於此乎定其見而知之者若顏若曾若思若孟述夫子之微旨而六經之蘊奧於此乎明所謂賢於堯舜而不在禹下者其以垂世立教有功於斯文而為言歟夫文之有六經也尚矣或以五數之蓋合禮與樂而摶其一也或以九數之蓋兼周禮論語孝經而附其三也獨大學中庸則混於禮記諸篇之中孟子一書則雜於荀卿諸子之列於是表裏經緯不相連屬卒使學者不

得其門而入於聖賢之域亦獨何哉惟汴梁舊有六經  
論語孝經石本乃近代辟雍之所樹者陵谷變遷修而  
復毀其殘缺漫剝不啻十之五六前政巨僚之賢而有  
文者亦不遑卹將七十餘年於此矣今參政公額森特  
穆爾一見而病之慨然以完復為已任義聲所激附和  
者衆不數月而復還舊觀奈何孟子七篇猶闕遺焉公  
習讀四書而明於大義者也亟欲增置適期會拘迫有  
司請為後圖公默然蓋有待於後舉也惟四書之著名



於世程子朱子之前未之有也無乃為異議乎噫此正  
斯文之緒所以絕而復續也何則六經成於夫子之手  
四書出於夫子之徒其同然之與自然殆所謂至妙至  
妙者歟我世祖皇帝聰明睿智高出前古雅知崇尚四  
書以其聖學精要在是故也嘗語一後生之不檢者曰  
曾讀四書否又嘗謂侍臣曰孔子之道三綱也五常也  
彼綴緝詩賦者皆浮詞耳大哉言乎真與二帝三王異  
世而同心於六經之大法可謂一言以蔽之矣惜乎不

刊之典為業雕蟲者磔裂而腐爛之也相臣大儒許衡亦曰小學四書吾敬信如神明其推尊如此亦猶夫子有從周之語初非外夫二代而不之取也石經既完復學士大夫咸謂是役也所關甚重誠不可以無紀且因而發揮諸經之大義亦不為無益乃以記文屬之不肖竊惟六經與四書之為教不過去人欲以復天理而已夫一氣運行於天地之間清者居上濁者居下明者居內暗者居外芳者居先臭者居後一則主乎生一則主

乎殺天理人欲各有攸屬陰陽淑慝之大分然也天以  
生道而福斯民人以生道而福其身有生之族何莫由  
斯道也姑即人生日用而觀之如理髮頰面彈冠振衣  
灑掃室堂滌濯器皿以致新致潔附於陽明之會而  
養之以福耳物之有滓顧所必去而况神明之府得容  
私欲之偽而為蠱於中邪苟為去之去之卒盡去之則  
天命之性率性之道不遠復而實有諸已矣是理也中  
庸一序備言之斯文正傳之統顧不在茲乎此不肖之

所與聞者蓋如此覃思累日於是乎書

熙春閣遺制記

王惲

梓人鈕氏者向余談熙春故閣形勝殊有次第既而又以界畫之法為言曰此閣之大槩也構高二百二十有二尺廣四十六步有奇從則如之雖四隅闕角其方數紆餘于中下斷鰲為柱者五十有二居中閣位與東西耳構九楹中為楹者五每楹尺二十有四其耳為楹者各二共長七丈有二尺上下作五檐覆壓其檐長二丈

五尺所以蔽虧日月而却風雨也閣位與平座疊層為四每層以古座通藉實為閣位者三穿明度閣而上其為梯道凡五折焉世傳閣之經始有二子掖醉翁過前將作者曰此即閣之制也取其成體故兩翼旁構俯在上層欄杓之下止一位而已其有隆有殺取其縹緲飛動上下崇卑之序此閣之形勢所以有瑰偉特絕之稱也予因念汴自壬辰兵後故苑蕪沒惟熙春一閣巋然獨存昔嘗與客三至其上徙倚周覽雖悵然動麥秀黍

離之感且詫其截案壯麗如神營鬼構洞心駭目有不  
可端倪者至不藉井幹不堦峻址飛翔突起干青霄而  
矗上又似夫鰲掀而鳳翥也予厯考秦漢已來宮殿之  
制漢不復於秦而唐不及於漢如未央長樂曾何得阿  
房之萬一含元華清又奚敢跂兩都之規制也蓋天地  
氣衰國資民力與林林之材不克取盈而尺度不足其  
數焉故也然熙春遺構亦可為近代之傑觀彼騷人詞  
客雖稱述賦詠極其偉麗是猶臆說庭章而徒彷彿其

千門萬戶而已終非梓匠不能知其規模與勝槩之所  
以然閣廢撤已久及聞鈕氏之說使觚稜金爵上雲雨  
飛舞空際者盡在吾目中矣然不文之言不足以達遠  
因作記以遺之鈕氏者斯世工師之良者也至元廿三  
年冬十月記

汴梁路城隍廟記

王惲

汴梁之廟事城隍神其來尚矣壬辰兵後廢撤不存河  
南路兵馬都總管劉侯福大懼無以妥靈揭虔曰事神

治人守吏職也可偏廢乎於是相新昌里築壇地西南  
二方界以通衢劉侯私第隣其東北則抵居民萬氏廣  
袤餘七畝繚以崇垣中起正殿像設有儼前敞臺門扃  
閤嚴肅左右則環齋構室敦請女冠孟景禮向妙順朱  
妙明輩相與住持寅奉香火景禮四元宗獻之女童非  
入道以彤管之懿資膺黃冠之妙選享年八十有五無  
疾而逝妙順亦出名家探索玄理解屬文辭與孟同年  
僊去景禮臨終貽屬妙明曰汝等祇嚴修潔善守廟祔



母負劉侯付託妙明唯曰敢不敬承誨音歲甲辰劉侯  
命侍人周氏韓氏披戴禮棲雲王真人為師訓周曰妙  
元韓曰妙溫與妙明為徒侶所需衣糧皆出劉侯資給  
妙溫妙明俱壽臻期頤相繼蟬蛻既而劉侯第四子保  
定路總尹某卒夫人徒單氏痛伉儷之中睽感榮華之  
易歇聿來栖跡法號妙真道俗咨嘆祠宇為增重焉妙  
元洎妙真罄刮粧奩刻苦樽節遂重脩正殿臺門創建  
獻廡子孫司及道衆寮舍齋厨輪奐一新蒙洞明真人

稱賞加妙元以純貞素德散人之號今年登七袞日誦  
五千玄言為課朝夕焚誦祝聖人壽願天下安鶴髮童  
顏精健不少衰復慮興建本末不能昭晰於後走書幣  
京師求記於秋澗翁子宦遊大梁者屢矣故國遺蹟亦  
嘗周覽今雖衰老忍無一言載名其間謹按祀典陽氣  
升而天神降地道肅而人鬼出自邦國達於臣庶祭秩  
切近者社稷五祀而已城隍神初未載也世說秦功臣  
馮尚見夢於漢高帝曰奉天帝命與王知領城隍陰事

雖儻恍不可致詰然自漢訖今遂為天下通祀社與五  
祀雖有常尊當時用事莫城隍若也況汴梁為六代都  
會四方輳集城池盤礴衢陌交通人物繁夥精英之萃  
集晝夜開闔死生變化幽明兩間其有神為之主司也  
審矣夫城隍地道也古人求神各以其類今俾女冠主  
其祀事宜矣傳曰西子蒙不潔則人皆掩鼻而過之雖  
有惡人齋戒沐浴可以事上帝言誠潔可以感通神明  
也如景禮妙明妙元妙真等式出於詩禮名家薰膏鼎

族清修道行敬恭神祇以致廟貌完固闔郡瞻仰雖其誠篤致然亦由神明有以護持者哉而推源本自不忘劉侯經始之勤是可書大德三年十二月吉日記

三皇廟記

吳炳

皇元立制於凡古帝王明聖功德之載祀典者有大詔令則即其所祭之有司擇日行事其祝幣牲牢之數因時損益祭已即去三皇乃因舊制立廟郡縣有常所祀用莫春之初有常日其祝幣牲牢之數有司恪守不敢

有隆殺焉有常禮豈不以勲被天下與一時之澤視開天之聖立極於萬世者廣狹不同而國家所以崇德報功者亦因之有厚薄歟汴梁路去京師千五百里而近治開封尹故地總州縣數十為大府省憲咸在土地人民之廣繭絲保障之任不後旁郡其諸神祀崇樓閣殿峻基宇而凌空虛者遠近相望皆興於私家獨力乘堅良而擅素封者奔走恐後三皇之祭宮不踰畝在艮岳廢基之顛如無所于託而姑栖焉者主祠配饗合食一

堂前後尊卑不紊無秩叙几筵俎豆不比於禮拜伏薦裸  
寔于登陟若是者盖有年矣所司視為故常不屬于意  
方以不飭郵傳為大故非所以奉明制而崇聖祀也然  
土功之興民亦勞止為之以漸人不告病而功倍常是  
一材之積一甓之用有不可少者是為之兆後將有興  
起焉若無忝絜之積徒太息于此將無所為計猶病七  
年求三年之艾苟不畜之終身無所及矣若李侯者其  
有知于此歟李侯之來也能奉宣上命以惠愛為治首

脩儒學顧瞻是廟乃喟然歎曰時尹之責其何敢後乃  
買田以拓故址夫土錙之啜譏于已陋施之古昔似無  
大失乃命埏埴之工為登豆簠簋爵坫壘犧象之尊奠  
池彝鼎無不具者粥銀五流造用器命吏籍之分官田  
二千五百畝有奇以畀醫學議定代期及之會朝廷有  
停役之命遂不果就遣掾王國輔請文以記之若有望  
于後者侯之用意勤矣君子于義所當為者惟力是視  
成否遲速幾不在我侯為是廟先事儲積而張其本者

又豈特一材一甕而已邪後之來者其才行皆膺選拔而尹是邦方將奉行國家崇德報功之意與夫林然以生羣然以居室處而火食養生以送死與主是廟者仰視几筵俯食土田之入孰非蒙三皇之澤者哉皆將攘臂爭先趨蹶卒事其孰不曰是廟之脩自李侯始亦何病其不出於已也侯名信字可復上黨人前為京尹治有能聲今以正議大夫為總管云副之者朝散大夫同知崔阿沙奉議大夫治中劉巨源承務郎推官張君謙



贊之者承務郎經歷李獻而董是役者亦王國輔也

開封府重修廟學記

明于謙

夫子之道天之道也天之道亘萬古而不息夫子之道  
歷萬世而無弊刪述六經昭揭宇宙日月之照臨也教  
化之澤洽於人心雨露之霑被也所謂生民以來所未  
有而三代以降君天下者未有不循此而能治者也我  
國家列聖相承咸用此道內而京畿外而郡邑莫不建  
立廟學以祀孔子以育才俊所以資化源而崇教本也

開封為中州甲郡故有廟學歲久隳圯儀觀弗稱前郡  
守黃公瑾有志作新成功僅及一二而以休致去今郡  
守舒侯下車之初即以興起斯文為已任遂極力為之  
而方牧諸公咸捐俸資以助經費於是增庠而為崇闕  
隘而為廣飾陋而為華自禮殿講堂以及諸生肄業會  
食之所莫不畢備規制宏麗視昔有加郡博士黃宗謂  
此不可以無記因率諸生來請余言惟夫子之道如天  
朝廷作人之化亦如天諸士子生際盛時沐浴清化又

有賢方牧郡守以作興之廟學之新文化之新也儀觀之盛士風之盛也關係豈偶然哉為師弟子者朝于斯夕于斯絃誦于斯游息于斯其亦知所本乎苟知所本則涵養本源砥礪素行學必造其根柢而弗專事乎言語文字之末異時出而致用得志則行其道于天下事與志違則求無愧於名節無愧於天地鬼神而後已若然則無負於聖人在天之靈無負於朝廷作養之化而亦無負於天矣其於郡守作興之意豈不重有光邪侯

名瞳字仲曦浙東姚江人以名進士起家拜黃門郎被薦出守是邦是舉也足以知其善政云

祥符縣重修儒學記

劉昌

祥符即古浚儀縣國朝省開封縣入之其學宮創始無所考河南左布政使廬陵李昌祺云宋置都于此既設國子監則縣無緣更置學今學即雲老寺及祥符縣故址也國朝洪武五年知縣胡聶創建規制粗備而圯於水永樂四年知縣王春始修復之宣德十年教諭沈麟

求得鐘樓餘材三百因大為理飾又闢道左右表以文  
林巍乎煥然士民聳觀暨天順五年蓋已二十有六稔  
腐蠹相繼比河決郡城遂蕩析無遺矣明年予以按察  
副使提學既至則有司已作禮殿講堂而廊廡齋舍漸  
亦就緒未甚宏偉予乃謀於二三寮友寅恭克協僉議  
維同今按察副使安成王公齊首為之作饌堂於是庖  
湍庫庖悉還舊列左布政使四明章公繪復即左右故  
道表以興賢育才而教諭陳禎又率士民之好義者作

二門其在禮殿之前者曰櫺星在講堂之側者曰禮門  
又表其出入所必由曰義路櫺星之南地廣二百弓嘗  
為汴渠所經渠雖湮而積水如故人頗病涉按察使建  
安劉公福副使泰和歐陽公熙為作石梁于上稍南臨  
通衢而王公又作飛樓適視兵商洛不果今按察使關  
中宋公欽甫蒞任即詣學周覽且曰我不可不任厥功  
曾未幾時竟登于成所謂巍乎煥然士民聳觀者益有  
加于昔諸生相率請記夫求道必以學學必有師孔子

萬世之師也人所以靈承向慕者宜無所不用其心況學宮乎況浚儀為中州之首邑乎孔子過儀儀封人云天將以夫子為木鐸晉地道記曰儀封人見孔子即此浚儀蓋在當時其邑人已知靈承向慕如此況我朝列聖繼作尊崇孔子檢詳學制諸生之所耳濡而目擊者又生長中州風俗素厚之地惟勤於誦數而務端其本以如諸公之靈承向慕而持之堅焉則於斯道也不幾矣乎皆應曰諾遂書以授之俾刻為記

揚州門新造石牌記

呂原

汴梁元河南行省治所而其地則所謂天下之樞也肆我皇明之初嘗建為北京既乃分封周王於此并置河南都布按三司而附以府縣衛所焉其城周迴二十里外則繚以堤當宋時近於城者惟汴蔡諸水而黃河流經城之東北以達於海至元時河始南徙逼城流合汴泗入淮國朝正統戊辰亦嘗分決張秋口東北入海其後復東南入淮如故築堤護城其來蓋已久矣夫土疏



固易遷徙而流雜泥沙又易淤澱以其故水載高地堤日增而城以下也天順五年秋七月四日客水暴至河溢踰防土城遂決越六日風激浪擁突北門以入平地水深丈餘王府及官衛儒黌廬井市廛無慮數萬區盡浸沒推圯力能結筏者僅以身免而老弱者往往溺死事聞上特命工部右侍郎瓊臺薛公遠往拯治之璽書授以事宜公星馳至汴敷宣帝德綏爰衆感即移粟以賑其饑躬率三司官僚按視地形商度工用及以緩急

詢之故老乃命左布政使侯臣按察使吳中徵集丁夫  
預調塞治之物於所屬委開封府知府魚侃通判蔡保  
等管領應役先令右布政使豐慶副使項璉於決口上  
流督夫下椿捲埽作截水堤二百四十餘丈浹堤就  
決口絕流而水趨故道又令副使張諫參議王鉉於土  
城東起獨巒岡訖猫兒岡督夫鑿渠二千二百七十八  
丈引水東注而城中積水日漸耗減又命參議史敏僉  
事高達於土城東南曰揚州門浚舊渠之湮塞者起太

平岡直抵陳留渠長一萬二千四百八十丈以洩城中  
積水使下流達于黃河自是地稍高者咸得修葺舍宇  
凡王府等廨署亦漸可居而軍民蕩析流離者接踵復  
業野田堪乂者俱播宿麥矣顧城地最低窪積水莫能  
盡出則令參議蕭儼李浩僉事王紹督夫車戽參議何  
陞又導而分之閱月水盡乾涸初環城五門俱有潦水  
河決後水益瀾漫無津畔往來者必藉舟楫一遇風濤  
莫或敢濟由是米薪之價湧貴數倍則又令項璉等築

道路於大梁仁和等三門以通車馬內外莫不便之且  
令李浩修補城垣缺處及剏築各門月堤軍民有貧餒  
及缺種子者給以粟麥凡八千餘石有屋居漂蕩無存  
者給以棖櫟共一萬三千餘株事將竣因念積水全賴  
開渠浚導議即揚州門置牒以限外內倘後內水有積  
啓而洩之或外水欲入閉而塞之庶為永久之利適巡  
按御史梁公覲董公廷圭至議用克協即委布政司照  
磨金景輝等於鄭之賈峪山採石煉灰勸客舟如期輸

至就令景輝及開封推官劉錡董役未幾牖成蓋首事  
於是年九月十二日而以明年二月二十六日輟工凡  
役丁夫三萬八千四百二十一用椿木三萬一百七十  
四芟稍以束計者一十二萬七千四百捷國以件計者  
三千二百麻以斤計者九千七百八十六而牖用石八  
百餘片磚二萬餘塊灰三萬餘斤是役也諸公開誠勸  
諭人心咸悅故勞雖久而無怨費雖鉅而易完也及薛  
公已還闔城士庶咸謂其仰體朝廷之心既拯民於昏

墊又防患於未然其德宏其慮遠宜有述以告來者而  
崇明訓導祥符艾俊為書以求予記嗟夫中原水患惟  
河為甚而禹之治河也務多其委以分其勢故當大伾  
而下析為二渠大陸而下播為九河今河失禹道治之  
固難如能先事為備訪求遺瀆以為委則亦不至臨事  
而失措矣穿渠置牐蓋知從事於委者然委弗多而泛  
溢所當虞也因記夫施工次第并贅以是說云

序

送權秀才之汴州序

唐韓愈

伯樂之厩多良馬卞和之匱多美玉卓犖瓌恠之士宜  
乎遊於大人君子之門也

恠或作奇

相國隴西公既平汴州

西下或有董字

天子命御史大夫吳縣男為軍司馬門下之士

權生實從之來權生之貌固若常人耳其文辭引物連  
類窮情盡變宮商相宣金石諧和寂寥于短章春容乎  
大篇如是者閱之累日而無窮焉愈常觀於皇都每年  
貢士至千餘人或與之遊或得其文若權生者百無一

二馬如是而將進於明有司重之以吳縣之知其果有成哉於是咸賦詩以贈之

送汴州監軍俱文珍序并詩

隴西公董晉為宣武軍節度使治汴

州俱文珍為監軍愈為觀察推官文珍將如京作序詩送之時貞元十三年也

今之天下之鎮陳留為大

陳留屬汴州宣武節度使所治汴宋亳潁四州隸焉屯

兵十萬連地四州左淮右河抱負齊楚濁流浩浩舟車

所同故自天寶已來當藩垣屏翰之任有弓矢鈇鉞之

權皆國之元臣天子所左右其監統中貴必材雄德茂



榮耀寵光能俯達人情仰喻天意者然後為之故我監  
軍俱公輟侍從之榮受腹心之寄奮其武毅張我皇威  
遇變出奇先事獨運偃息談笑危疑以平天子無東顧  
之憂方伯有同和之美十三年春將如京師相國隴西  
公飲餞於青門之外謂功德皆可歌之也命其屬咸作  
詩以鋪繹之詩曰

奉使羗池靜臨戎汴水安冲天鵬翅闊報國劒鋌寒曉  
日驅征騎春風詠采蘭誰言臣子道忠孝兩全難

送楊凝郎中使還汴宋詩後序 柳宗元

談者謂大梁多悍將勁卒亟就猾亂而未嘗底寧控制之術難乎中道蓋以將驕卒暴則近憂且至非所以和衆而又民也將誅卒削則外虞實生非所以捍城而固圉也是宜慰薦煦諭納為腹心然後威懷之道備聖上於是撫以表臣

書立政篇藝人叔臣百司表臣表幹之臣謂董晉為宣武軍節度

贊以

藝人

謂以楊凝檢校吏部郎中汴宋毫穎觀察判官

參剛柔而兩用化逆順而

同道既去大憝遂室有衆故楊公以謀議之隙對揚王

庭不踰時而承詔復命示信于外諸侯時當朝之羽儀

凡同官之寮屬皆餞焉容受童孺使在末位

子厚時年二十七

禮部郎中許公

許孟容字公

以宏才奧學已任文字顧唱在

席咸斷章而賦焉謂工部郎中崔公

崔羣字鼓禮

文為時雄

允宜首序謂小子預離觴之餘瀝俾撰後序編以繼之

大凡軍旅之制贊佐之重崔公序之備矣膺命受簡欲

默不敢故書談者之辭拜手以獻用充餘篇云

蓬池禊飲序

蕭穎士

禊逸禮也鄭風有之蓋取諸勾萌發達陽景敷照握芳  
蘭臨清川乘和蠲潔用徽介祉厥義存矣晉氏中朝始  
參燕胥之樂江右宋齊又間以文詠風流遂遠鬱為盛  
集焉若夫華林曲水萬乘之降也蘭亭激湍專城之踐  
也而方伯之懽未始前聞以俟乎今辰粵天寶乙未暮  
春三月河南連帥領陳留守李公以政成務簡方國多  
暇率府郡佐吏二三賓客暢飲於蓬池備祓除之禮也  
梁有蓬池尚矣前迄潏潏右匯郭邑渺彌淪連盪日澄

天舟楫是臨泛波景從其左則遙原縈屬崇岡傑竦嘉  
卉異芳雜樹連青即為臺亭登眺斯在爾乃郡曹頒錡  
以給費縣吏領徒而脩頓先夕以定議詰朝而集事是  
日方牧乃擁車徒曳旌旃卯出乎北牖辰濟乎南川匪  
疾匪閑翼翼闐闐以稅駕于東焉然後降春流颺綵舟  
羽觴芳羞緩舞清謳援青蘋駭紫鱗廻環中汀緬望南  
津飫于已酣于未歌樂只賦既醉坐闌而靡怠日入而  
未闕陶陶乎有以表勝境佳辰之具美名公好事之厚

意下客不敏聞於前載曰夫德洽禮成則詠歌繫之梁故魏也請皆賦詩志焉

相國寺維摩院聽琴序

宋曾鞏

古者學士之於六藝射能弧矢之事矣又當善其揖讓之節御能車馬之事矣又當善其驅馳之節書非能肆筆而已又當辨其體而明其意數非能布策而已又當知其用而各盡其法而五禮之威儀至於三千六樂之節文可謂微且多矣噫煩且勞如是然古之學者必能

此亦可謂難矣然習其射御以禮習其干戈於樂則少於學長於朝其於武備固脩矣其於家有塾於黨有庠於鄉有序於國有學於教有師於視聽言動有其容於衣冠飲食有其度几杖有銘盤杆有戒在輿有和鑾之聲行有佩玉之音燕處有雅頌之樂而非其故琴瑟未嘗去於前也盡其出入進退俯仰左右接於耳目動於四體達於其心者所以養之至如此其詳且密也雖然此尚為有待於外者爾若夫三材萬物之理性命之際

力學以求之深思以索之使知其要識其微而齊戒以守之以盡其材成其德至合於天地而後已者又當得之於心夫豈非難哉噫古之學者其役之於內外持其心養其性者至於如此此君子所以愛日而自強不息以求至乎極也然其習之有素閑之有具如此則求其放心伐其邪氣而成文武之材就道德之實者可謂易矣孔子曰興於詩立於禮成於樂蓋樂者所以感人之心而使化故曰成於樂昔舜命夔典樂教胄子曰直而



溫寬而栗剛而無虐簡而無傲則樂者非獨去邪又所以救其性之偏而納之中也故和鑾佩玉雅頌琴瑟之音非其故不去於前豈虛也哉今學士大夫之於持其心養其性凡有待於外者皆不能具得之於內者又亦皆畧其事可謂簡且易矣然所以求其放心伐其邪氣而成文武之材就道德之實若豈不難哉此予所以懼不至於君子而入於小人也夫有待於外者余既力不足而於琴竊有志焉久矣然患其莫余授也治平三年

夏得洪君於京師始合同舍之士聽其琴於相國寺之  
維摩院洪君之於琴非特能其音又能其意者也予將  
就學焉故道予之所慕於古者庶乎其有以自發也同  
舍之士丁寶臣元珍鄭穆閔中孫覺莘老林希子中而  
予曾鞏子固也洪君名規字方叔以文學吏事稱於世  
云

吹臺春遊序

明劉醇

汴昔輦轂之地名園勝境甲於四方每遇良辰佳節往

往為士大夫遊觀之所自中原用武兵燹之餘所存無  
幾而又河水湮沒若金明池蔡太師湖之類亦泯然無  
跡可覩惟城東南僅三里有荒臺故基巍然獨存挺出  
風煙之外高廣數丈可登可眺即古之吹臺也臺西有  
寺民廬相接竹木蕭然風景可愛又東行六七里臨水  
有村漁舟牧笛野意超絕比之臺西景物頓殊時方上  
巳春光駘蕩草木爭榮鳥哢魚游欣然自得友人王庭  
璣邀余暨子山艾公體方黃公輩同往造焉具酒餽設

几席列坐于芳樹之間深杯迭進清歌間作衆賓歡飲  
余亦酣暢恍然如在桃源深處不覺世慮之俱忘也盖  
景與時會事與謀諧主既風流賓亦醞藉昔人所謂四  
美具二難并者實兼而有之矣况又歲屢豐稔人多閑  
暇不負疇昔所約得與同遊以踵前賢故事何其幸邪  
既而日暮將歸據吟鞍歌醉帽或語或笑前後相續故  
老指而嘆曰昔時太平氣象復見於今日矣於是庭璣  
乃繪以為圖列次衆賓姓名俾余叙其事用傳于將來

余謂光陰迅速如駒過隙人生幾何乃終日汨沒於塵埃之中而不知止所謂及時行樂秉燭夜遊者必待何時而可乎詩云今我不樂日月其除斯言也觀者或有取焉

吹臺駐節詩序

劉昌

開封為古蓬池忌澤之藪梁惠王發以賜民因名開封文獻通攷云今郡城西古城惠王所築也城南有吹臺世乃言梁孝王臺何邪顧謹中輩至指開封為梁園又

何邪夫孝王國于梁自是梁郡在今歸德州睢陽宋城之間李白所作梁園吟正指此開封在漢為陳留郡非孝王封內則吹臺烏得為孝王臺邪予纂中州勝覽始據梅聖俞詩而訂正之聖俞之詩曰在昔梁惠王築臺聚歌吹笙簫無復聞黃土化珠翠較然有足徵者矣唐杜甫從李白登吹臺慷慨悲歌為一時所慕故後世騷人詩客以不得至開封登吹臺歌嘯為欠事况當明盛之時挾能賦之才有如吾進士陸君建節過從登臺弔

古以發千載之遐思于中州之地而揚眉吐氣騁其所  
欲言者乎此宜見重於開封之大夫士而吹臺駐節詩  
所由作也周禮言凡通達於天下者必以節無節則不  
達故當時有玉節角節虎節龍節各用於其所宜漢世  
用竹今用符以印章合而行事亦即古之所謂璽節也  
然節不在物而在人人其有毅然不撓之節斯然後達  
於事而無滯故大易有云安節亨陸君之使於開封也  
溫乎其恭也秩乎其度也凜乎其所持也其心蓋欲與

杜甫李白爭優劣則豈特登高能賦而已其遠且大固有能辨之者而為一時所慕又必由今以及後於是祥符學諭陳君裒今大夫士所作詩將以送陸君以存故事而授予觀予推本而叙之

欽謨此序謂梁園當在睢陽宋城之間直以吹臺為梁惠王築而取證於梅聖俞之詩按漢書梁孝王築東苑三百餘里疑自開封至睢陽皆其封內也杜甫詩昔我遊宋中惟梁孝王都氣



酣登吹臺云云而本傳云甫嘗從李白及高適  
過汴州登吹臺此又何也

中州覽勝序

唐寅

吾黨表臣器少年氣逸溫然玉暎蓋十室之髦懿也弘  
治丙辰五月忽翻然理篙櫂北亂揚子歷彭城漸于淮  
海抵大梁之墟九月來歸乃繪所經歷山川陵陸并衝  
隘名勝之處日夕展弄目游其中予忝與鄉曲得藉訪  
道里宛宛盡出指下蓋其知之素而能說之詳也予聞

丈夫之生剡蒿體揉柘幹以麗別室固欲其遠陟遐舉  
不齷齪牖下也而愿慤者懷田里沒齒不窺閭閻曰世  
與我違甘與菑木委灰同棄雖有分寸而人莫之知也  
后世因莫之建白也是余固欲自展以異而類然青袍  
掩脰馳驚士伍中而身未易自用也雖然竊亦不能久  
落落于此臣器新從魏地來今不知廣陵有中散之遺  
聲歟彭城項氏之都也今麋鹿有幾頭歟黃河故宣房  
之基在否歟大梁墟中有持盂羹為信陵君祭與無也

臣器其為我重陳之余他日當叅驗其言

汴京遺蹟志卷十五